

## Evening Dogri (NSD) News Bulletin

09 Jan. 2026

आकाशवाणी

खबरां विजय बजाज कोला

खास-खास खबरां

- गृह मंत्री अमित शाह होरें देशै दे आई.ई.डी रोधी सरिस्ते ते अंदरूनी सुरक्षा ढांचे गी तगडा बनाने लेई राश्ट्री आई.ई.डी डेटा प्रबंधन प्रणाली दा शुभारंभ कीता ऐ।
- दिल्ली दी इक अदालतै राश्ट्री जनता दल दे अध्यक्ष लालू प्रसाद यादव ते उं'दे परोआर दे सदस्ये खलाफ रेलवे नौकरिएं लेई जिमीं भ्रष्टाचार मामले च आरोप तय करी दित्ते ना।
- बदेश मंत्री डाक्टर एस. जयशंकर होरें फ्रांस दे राष्ट्रपति इमैनुएल मैक्रों हुं'दे कन्नै मलाटी करियै मजूदा दौर दिएं आलमी घटनाएं दे मद्देनज़र भारत ते फ्रांस दी सांझ-भ्याली बारै चर्चा कीती।
- ईरान दे सबनें 31एं सूबे च सरकार-बरोधी प्रदर्शनें दे 13में ध्याड़े बी जारी रौहने दे मद्देनज़र उत्थुं दी सरकार नै पूरे देसै च इंटरनेट पर बंदिश लाई दित्ती ऐ।
- भारत दी बैडमिंटन खड्डारन पी.वी. सिंधु कुआलालम्पुर च खेड्डी जा'रदी मलेशिया ओपन टूर्नामेंट दे सेमीफाईनल च पुज्जी गेइयां ना।

<><><><><><>

HM -NIDMS

केन्द्री गृह ते सहकारिता मंत्री अमित शाह होरें अज्ज वर्चुअल तरीके राहें राश्ट्री आई.ई.डी डेटा प्रबंधन प्रणाली NIDMS दा शुभारंभ कीता। उनें इस प्रणाली गी आई.ई.डी रोधी ते अंदरूनी सुरक्षा बवस्था

गी मजबूत करने दी दिशा च इक महत्वपूर्ण गेंह करार दिता। इस मौके पर श्री शाह होरें आखेया जे इस प्रणाली दे राहें एजेंसियें बश्कार अंदरुनी तालमेल होर बेहतर बनोग। उनें आखेया जे एह प्रणाली स्हेई सूचना गी स्हेई समें ते स्हेई थाहर पर पुजाने दा असरदार ज़रिया बनोग। राश्ट्री सुरक्षा गार्ड आसेया विकसित एह प्रणाली-राश्ट्री स्तर दा इक सुरक्षित प्लेटफार्म ऐ- जेहदा मकसद आई.इ.डी कन्नै सरबंधत डेटा दे बवस्थित संग्रह- मेल ते प्रसार गी सक्षम बनाना ऐ। श्री शाह होरें आखेया जे एह प्रणाली देश भरै च आतंकवाद रोधी दस्ता इकाई- पुलस ते केन्द्री थेहारबंद पुलस बलें गी ऑनलाईन डेटा तोड़ी पुजने ते ओदे इस्तेमाल च सक्षम बनाग। श्री शाह होरें गलाया जे एह प्रणाली औने आहले दिनें च इक सुरक्षा कवच दे तौरै पर कम्म करोग ते एह देशै च आतंकवादियें आसेया आई.इ.डी दे इस्तेमाल जां धमाकें दियें घटनाएं दी जांच दे दरान विश्लेषण आस्तै डेटा उपलब्ध करोआग। श्री शाह होरें दस्सेया जे गृह मंत्रालय नै पिच्छले किश बरे दरान बक्ख-बक्ख चाल्ली दे आंकड़े किट्टे कीते न पर इनें सब्भनें दे स्रोत बक्ख-बक्ख ना। उनें विश्वास जताया जे NIDMS आली एह प्रणाली जांच ते विश्लेषण दी प्रक्रिया च तेजी आहन्नोग।

<><><><><><>

## Lalu- Charges

राश्ट्री जनता दल दे अध्यक्ष लालू प्रसाद यादव ते उंदे परोआर दे खलाफ दिल्ली दी इक अदालतै अज्ज रेलवे जिमीं दे बदले नौकरी भ्रष्टाचार मामले च आरोप तय करी दिते ना। केन्द्री जांच ब्यूरो- सी.बी.आई इस मामले दी जांच करा रदी ऐ। राउज़ एवेन्यु अदालतै आखेया ऐ जे लालू प्रसाद यादव- उंदी घरै ईली राबड़ी देवी- पुत्तर तेजस्वी यादव ते तेज प्रताप यादव- धीऽ मीसा भारती ते हेमा यादव सनें केंइयें होरनें आरोपियें दे खलाफ भ्रष्टाचार- धोखाधड़ी ते अपराधिक साजिश दा मामला बनदा ऐ। अदालतै लालू प्रसाद यादव हुंदे खलाफ भ्रष्टाचार दी रोकथाम सरबंधी कनून 1988 दियें बक्ख- बक्ख दफाएं तैहत होरनें अपराधें दे कन्नै एह आरोप तय कीते ना। बशेश न्याधीश होरें आखेया जे लालू यादव ते उंदे परोआर दे सदस्यें अपराधिक साजिश रची ऐ ते इनें कथित तौरा पर अचल सम्पत्ति हासल करने लेई रेलवे च रोजगार गी इक हथियार दे रुपै च इस्तेमाल कीता ऐ।



## Nadda CNCE

सेहत ते परोआर कल्याण मंत्री जगत प्रकाश नड्डा होरें अज्ज कोलकाता दे न्यू टाऊन च स्थित चित्तरंजन राश्ट्री कैंसर संस्थान च सुविधाएं ते सेहत सेवाएं दी समीक्षा कीती। श्री नड्डा होरें अस्पताल दे मलाज़में कन्नै गल्लबात कीती ते मरीजें कन्नै मिलियै इलाज ते दिक्खभाल दी गुणवत्ता दा आंकलन कीता। केन्द्री मंत्री होरें इक उच्चि सतह दी बैठक च वरिष्ठ डाक्टरें ते प्रशासन दे कन्नै परिचालन सरबन्धी मामलें ते मैडिकल ढांचे कन्नै जुडे दे मुद्दें पर बी चर्चा कीती।



## S. Jaishankar -France

वदेश मंत्री डाक्टर एस.जयशंकर होरें अज्ज पेरिस च फ्रांस दे राश्ट्रपति इमैनुएल मैक्रो हुंदे कन्नै मलाटी कीती। सोशल मीडिया दी इक पोस्ट च डाक्टर जयशंकर होरें मजूदा दौर दियें आलमी घटनाएं पर मैक्रों हुंदे बचारें ते रणनीतिक सांझ-भ्याली दे प्रति सकारात्मक नज़रिये दी सराहना कीती। वदेश मंत्री होरें फ्रांस दे राजदूतें दे सम्मेलन गी बी सम्बोधित कीता। इस मौके पर उनें बपार- रपे-पैसे- तकनीकें- ऊर्जा- संसाधनें ते सम्पर्क दे खेतरें च आलमी सतह पर बड्डी तब्दीलियें पर जोर दिता। उनें मते धडे आली ते रणनीतिक खुदमुख्तयारी गी बढावा देने च भारत ते फ्रांस दी सांझ-भ्याली पर बी चर्चा कीती।



## PM -Guj Visit

प्रधानमंत्री नरेन्द्र मोदी कल्लै थमां गुजरात दी त्र'उं दिनें दी जात्तरा पर जाडन। श्री मोदी स'झां लै सोमनाथ पुज्जडन ते ओंकार मंत्रोच्चारण च शामिल होडन। ओहू सोमनाथ मंदर च ड्रोन शो बी

दिक्खडन। प्रधानमंत्री होर ऐतवारें शौर्य जात्तरा च बी हिस्सा लैडन। एह जात्तरा सोमनाथ मंदरै दी राक्खी लेई अपनी जिंदुएं दा बलिदान देने आहले अनगिनत योद्धाएं दे सम्मान च आयोजित कीती गई ऐ। श्री मोदी सोमनाथ मंदरै च दर्शन ते पूजा अर्चना करडन। प्रधानमंत्री सोमनाथ स्वाभिमान पर्व च बी शामिल होगं। एहदे परैन्त, प्रधानमंत्री होर राजकोट जाडन ते कच्छ ते सौराष्ट्र लेई आयोजित वाइब्रेंट गुजरात क्षेत्रीय सम्मेलन च शामिल होडन। श्री मोदी इस सम्मेलन च इक बपार मेले ते प्रदर्शनी दा उद्घाटन करडन। प्रधानमंत्री होर राजकोट थमां अहमदाबाद लेई रवाना होडन ते ओहू सेक्टर 10ए थमां महात्मा मंदरै धोड़ी अहमदाबाद मेट्रो दे दुए चरण दे बाकी रौहदे हिस्सा दा बी उद्घाटन करडन।



## Defence Self Reliant

रक्षा मंत्री राजनाथ सिंह होरें आखेआ ऐ जे रक्षा खेत्तर, रक्षा उत्पादन च आत्म-निर्भर बनने दी दिशा च अगड़ा बधा करदा ऐ। उंनें अज्ज उत्तर प्रदेश च अपने निर्वाचन हलके लखनऊ दे सरोजनी नगर इलाके च इलैक्ट्रिक गड्डिं दे उत्पादन संयंत्र दा उद्घाटन कीता। केन्द्री मंत्री एच.डी. कुमार स्वामी ते मुख्मंत्री योगी आदित्यनाथ बी इस मौके पर उत्थे मजूद हे। रक्षा मंत्री होरें आखेआ जे सरकार ने केई नियमें गी सखल्ला बनाई दिता ऐ ते केई ऐसी जरूरी गैहीं पुट्टियां न जिं'दे कन्नै निवेशकें ते बवसायियें दा बी विश्वास बधेआ ऐ। उंनें आखेआ जे पैहले सालाना रक्षा उत्पादन 46 ज्हार करोड़ रपे हा- जेहड़ा हुन बधियै डेढ लक्ख करोड़ रपे सालाना होई गेदा ऐ। रक्षा मंत्री होरें आखेआ जे रक्षा खेत्तर च निर्यात च बी केई गुणा बाद्दा होआ ऐ। पैहले एह इक ज्हार करोड़ रपे सालाना हा- जेहड़ा हुन बधियै 25 ज्हार करोड़ रपे सालाना होई गेआ ऐ। उंनें मेद बुज्जी जे रक्षा निर्यात 2029-30 तगर 50 ज्हार करोड़ रपे दे लक्ष्य गी पार करी जाहगा।



## Goyal EU Talks

उद्योग ते बपार मंत्री पीयूष गोयल होरें अज्ज ब्रुसेल्स च यूरोपीय संघ दे बपार ते आर्थिक सुरक्षा कमिशनर मारोस सेफकोविक हुं'दे कन्नै उच्चि सतह दी गल्लबात कीती। सोशल मीडिया पोस्ट च श्री गोयल होरें आखेआ जे एहू चर्चा भारत ते यूरोपीय संघ बश्कार आपसी तौर पर लाहकारी मुक्त बपार समझौते गी खीरी रूप देने दे जतनें तैहत आयोजित कीती गई। उ'नें आखेआ जे गल्लबात दे दरान प्रस्तावित समझौते दे प्रमुख खेत्तरें पर बचार-बटांदरा कीता गेआ। श्री गोयल होरें दस्सेआ जे उ'नें नियमें पर आधारित बपार ढांचे ते आधुनिक आर्थिक सांझे-भ्याली दे प्रति अपनी वचनबद्धता गी परतियै पक्का कीता ऐ जेह्डी भारती उद्योगें गी आलमी सतह दिएं आपूर्ति शृंखलाएं च संगठित करदे होई करसानें ते लौहके ते दरम्याने दर्जे दे उद्यमें दे हितें दी राक्खी करदी ऐ।

<><><><><><>

## Creator's Corner

सूचना ते प्रसारण मंत्री अश्विनी वैष्णव होरें आखेआ ऐ जे प्रसार भारती दे वेब्स प्लेटफॉर्म गी आलमी सतह उप्पर बडी मती सराहना हासल होई ऐ ते एह्दे'नै 5 ज्हार करोड़ रुपें दा अंतरराष्ट्री बपार होआ ऐ। श्री वैष्णव होरें अज्ज डीडी न्यूज़ पर कंटेंट क्रिएटर्स गी सशक्त बनाने आस्तै शुरू कीते गेदे नमें प्लेटफॉर्म 'क्रिएटर्स कॉर्नर' दे शुभारंभ दे मौके पर एहू गल्ल आखी। उ'नें गलाया जे प्रसार भारती दी इस नमीं पैहल दा मकसद रचनात्मक समग्री गी प्रदर्शित करना ते इसी बढावा देना ऐ। श्री वैष्णव होरें आखेआ जे सरकार ने इक करोड़ युवाएं गी रचनाकार अर्थबवस्था कन्नै जोड़ने दा लक्ष्य मित्थे दा ऐ। श्री वैष्णव होरें आखेआ जे प्रधानमंत्री नरेंद्र मोदी होरें पिच्छले 11एं ब'रें च केई महत्वपूर्ण सुधार कीते न। उ'नें इब्बी घोशणा कीती जे सूचना ते प्रसारण मंत्रालय दा इस ब'रे पूरी चाल्ली परतियै गठन कीता जाह्ग जेह्दे च इक नमीं संचालन बवस्था दा विकास बी शामिल ऐ। श्री वैष्णव होरें आखेआ जे सूचना ते प्रसारण खेत्तर देशै दे बसनीकें दे जीवन गी प्रभावत करदा ऐ, इसकरियै प्रसारण दे महत्व गी परतियै नमें सिरेया स्थापत करने ते इसी अज्जै दी तकनीकें ते कम्मकाजी पद्धतियें मूजब ढालने आहले सुधारें गी लागू करना अत्त लाजमी ऐ। श्री वैष्णव होरें आखेआ जे इ'नें सुधारें कन्नै

रोजगार दे नमें मौके पैदा होने दी मेद ऐ। क्रिएटर्स कॉर्नर दा प्रसारण सोमवार थमां शुक्रवार तोड़ी स'जा 7 बजे डीडी न्यूज पर कीता जाह्ग।

<><><><><><>

## Uniform in Allowance

सरकारै विशेष सुरक्षा बल दे कर्मियें दे पक्ष च इक्क शुरुआती वर्दी भत्ता ते वार्षिक नवीकरण भत्ते गी मंजूरी दिती ऐ। आकाशवाणी जम्मू दे संवाददाता हुंदी रिपोर्ट मुजब गृह विभाग आसेया जारी किते दे इक आदेश दे मुताबक- विशेष सुरक्षा बल दे सदस्यें गी 20 ज्हार दा इक्को जेहा भत्ता दिता जाग। एह रकम उनेंगी 6-6 महीने बाद दंऊ किशते च मिलोग। एहदे इलावा इस आदेश च 5 ज्हार दे सालाना नवीकरण भत्ते आस्तै बी निर्देश दिते गेदे न- जेडे शुरुआती वर्दी भत्ते दी खिरी किशत मिलने दी तारीख दे इक्क बरे मगरा मिलगंन।

<><><><><><>

## Iran –Internet Blackout

ईरान च सरकार नै सब्बनें 31एं प्रांतें च होआ करदे बरोध-प्रदर्शनें गी दिक्खदे होई पूरे देसै च इंटरनेट बंद करी दिता ऐ। निगरानी समूह नेटब्लाक्स ने दस्सेया ऐ जे कल संजा थमां अज्ज बडुलै तगर पूरे ईरान च कनेक्टिविटी च विघ्न पेदा रेया ऐ- मोबाईल फोन सेवां बी बुरी चाल्ली प्रभावत होइयां। मनुक्खी अधिकारें सरबन्धी समूहें दी रिपोर्ट मूजब 28 दिसम्बर गी शुरु होए दे दंगें दे बाद थमां बच्चें सने 45 प्रदर्शनकारी मारे गे न ते 22 सौ शा मते लोकें गी गिरफ्तार कीता गेदा ऐ। बेदखल कीते गेदे युवराज रजा पहलवी दे आह्वान दे मगरा तेहरान ते होरनें प्रमुख शैहरें च बड्डे पैमाने पर बरोध-प्रदर्शन होए- जेदे परैन्त इंटरनेट बंद करी दिता गेया। प्रदर्शन दे दरान बड़ी बद्ध गिनतरी च लोकें-सिडकां बंद करियै अगगज़नी कीती ते सरकार खिलाफ नारे लाए। सुरक्षाबलें जवाबी कारवाई च गोलियां चलाइयां ते उत्थरु गैस दा बी इस्तेमाल कीता।

<><><><><><>

## Security-Tightened

औदें गणतंत्र दिवस आले समारोहें शा पैहले जम्मू-श्रीनगर राश्ट्री शिडक एन.एच-44 पर सुरक्षा बवस्था निगगर करी दित्ती गई ऐ। प्रशासन नै जरनैली शिडकै पर बादू नफरी लाने, जांच नाकें स्थापित करने ते गश्त बधाने दे हीलें गी अमल च आह्नेआ ऐ तां जे गड्डिं दी बवस्थित आओजाई दे कन्नोकन्नी कुसै माड़ी घटना गी बी रोकेआ जाई सकै। इनें हीलें दा मकसद कनून बवस्था दी स्थिति गी बरकरार रखना ते यात्रिं दी सुरक्षा गी यकीनी बनाना ऐ। अधिकारिं मूजब प्रदेश च गणतंत्र दिवस दिं तैयारिं दे इक हिस्से दे तौर पर सुरक्षा बवस्था निगगर करी दित्ती गई ऐ।

<><><><><><>

## Search Operation Samba

सुरक्षाबलें अज्ज साम्बा जिले च संदिग्ध नक्लो-हरकत दी टकोहदी सूह थ्होने मगरा जिले च तपाशी अभियान रम्भेया। आकाशवाणी दे जम्मू संवाददाता नै जानकारी दित्ती ऐ जे एह अभियान उस्सलै शुरु कीता गया- जिस्सलै कटली इलाके च मकामी लोकें आसेया इक संदिग्ध व्यक्ति गी थेहार कन्नै दिक्खेया गया। तोंआई SOG/ पुलस ते सी.आर.पी.एफ दी इक सांझी टीम नै जम्मू शैहरे दे बाहरले इलाके च सिधडा कश जंगली इलाके च बी तपाशी अभियान चलाया। एदे इलावा फौज ते पुलस नै जम्मू दे बन्ने आहले इलाकें मीरा-साहब च सांझे तौरा पर गड्डियें दी जांच कीती। एह अभियान सारी रात जारी रेहा ते सुरक्षाबलें इलाके च लंघने आली हर इक गड्डी दा मुआयना कीता।

<><><><><><>

## Special Train

उत्तरी रेलवे दे जम्मू डिविजन नै यात्रियों दी बद्धी मंग गी दिक्खदे होई नमीं दिल्ली ते श्री माता वैष्णो देवी कटड़ा बश्कार वशेश रेल सेवा 04081/04082 दी सेवा गी बधाने दी घोषणा कीती ऐ। आकाशवाणी दे जम्मू संवाददाता नै जानकारी दिती ऐ जे नमीं दिल्ली थमां कटड़ा लेई रेल नम्बर 04081 अज्ज ते कल चलोग- जिस्सलै के कटड़ा थमां नमां दिल्ली आस्तै ट्रेन नम्बर -04082 कल ते परसू 11 जनवरी गी चलोग। इस फैसले दा मकसद भीड़ प्रबंधन ते यात्रा गी सुविधाजनक ते सखल्ला बनाना ऐ।



### Full Literacy

जम्मू-कश्मीर दे 14 जिले पूरी चाल्ली साक्षरता हासल करी लैती ऐ जेहड़ी शिक्षा दे खेत्तर च इक बड्डी छाल ऐ। शिक्षा मंत्री सकीना इत्तू होरें आखेआ ऐ जे बाकी दे जिले जिंदे च बडगाम, कुपवाड़ा, रियासी, डोडा ते किश्तवाड़ गी बी तौले गै पूरी साक्षरता दा दर्जा हासल होई जाह्ग। उनें आखेआ जे जम्मू-कश्मीर सरकार समाज दे सभनें वर्गे लेई समावेशी ते बरोबरी आहली शिक्षा दे लक्ष्य कन्नै दूर-दरेडे इलाकें च विद्यार्थिं तगर पुज्जने आस्तै प्रौद्योगिकी आधारित पैहलकदमिं दे राएं सार्वभौमिक साक्षरता यकीनी बनाइयै ते स्कूली शिक्षा च सुधार करियै केंद्र शासित प्रदेश च शिक्षा सैक्टर गी मजबूत बनाने लेई बचने-बज्झी दी ऐ।



### Malasia Open

भारत दी पी.वी. सिंधु अज्ज क्वालालंपुर च मलेशिया ओपन सुपर बैडमिंटन टूर्नामेंट दे सैमीफाइनल च पुज्जी गेइयां- दुनिया दी नम्बर त्रै दी खडारन जापान दी अकाने यामागुची दे खेडु थमां हटने शा पैहले सिंधु नै पैहला सैट 21-11 कन्नै जित्ती लैता हा। दंडु बारी ओलम्पिक दा तगमा जित्ते आली

सिंधु दा मुकाबला इंडोनेशिया दी 6में नम्बरै दी खडारन पुत्री कुसुमा वरदानी जां चीन दी दुए नम्बरै  
दी खडारन वांग झी ची कन्नै होग।

<><><><><><>